

Pretensiuns vegnan examinadas

La petiziun areguard il rumantsch grischun en scola vegn surdada a la regenza

■ **(anr/hh) Il cussegl grond ha pri enconuschientscha da la petiziun davart il rumantsch grischun en scola, inoltrada il november passà da scolasts da l'Engiadina. Il medem mument ha el incumbensà la regenza d'examinar las pretensiuns e propostas fatgas en quell'intervenziun en connex cun l'elavraziun dal concept davart il diever dal rumantsch grischun en scola.** L'atun passà han ils scolasts da Samedan inoltrà al cussegl grond ina petiziun areguard il diever dal rumantsch grischun en scola. Quella è vegnida suttascritta da 4384 persunas. L'intervenziun prentenda tranter auter che la decisiun davart il rumantsch grischun, prida dal parlament chantunal en connex cun las mesiras da spargn, vegnia revocada. Plinavant duai vegnir elavurà in concept areguard l'introducziun differenziada dal rumantsch grischun en scola.

Tenor ils petiziunaris, na sa ina decisiun fundamentala davart il linguatg rumantsch betg vegnir prida en connex cun ina mesira da spargn. Els constateschan ch'ils differents idioms èn da muntada existenziala per il rumantsch.

Prender serius ils gavischs

La cumissiun per furmaziun e cultura dal cussegl grond ha proponì al parlament chantunal da prender enconuschientscha da la petiziun. La regenza duai vegnir incaricada d'examinar ils gavischs dals petiziunaris en connex cun l'elavraziun dal concept per l'introducziun dal rumantsch grischun en scola.

Tenor il president da la cumissiun, *Martin Butzerin* (pps, Arosa), na stat ina revocaziun da la decisiun dal cussegl grond, d'introdur il rumantsch gri-

schun en scola, dentant betg en discussiun. Ina tala correctura pretendessia ina decisiun da revegnir dal parlament chantunal. La cumissiun saja s'exprimida cleramain encunter ina tala.

Dumondas fitg difficilas

Deputà *Romedi Arquint* (ps, Cinuoschel) ha fatg allusiun da l'impurtanza e da la sensibladad da decisiuns en connex cun dumondas dal linguatg: «Enfin uss ha il chantun Grischun adina agì cun gronda precauziun, cura ch'el ha gi da sa fatschentar dals linguatgs.» El è led d'udir che la cumissiun per furmaziun e cultura dal cussegl grond propona a la regenza d'examinar las pretensiuns dals petiziunaris. El è dentant surstà che la decisiun fundamentala davart il rumantsch grischun en scola na vegn betg tschenta da en dumonda. Romedi Arquint cri-

titgescha l'agir dal chantun: «L'emprim vegn decidì d'edir ils cudeschs da scola davent dal 2005 mo pli en rumantsch grischun. Pér suenter vegn dentant entschavì cun in concept areguard l'introducziun dal rumantsch grischun en scola.» Per el èn memia blers puncts nunsclerids, spezialmain la scolaziun dals magisters, la finanziaziun dals meds novs, sco er ils dretgs da las vischnancas e las regions perturgant il linguatg. El appellescha da prender serius ils gavischs dals petiziunaris.

Il cussegl grond ha sustegnì la proposta da la cumissiun per furmaziun e cultura.

Cun 113:0 vuschs ha el decidì da surdar la petiziun a la regenza cun l'incarica d'examinar las pretensiuns dals petiziunaris, cun excepziun da la decisiun fundamentala prida en connex cun las mesiras da spargn.